

**U ovom broju, između ostalog, čitajte:**

- **Održana XXII redovna izborna skupština Udruženja poslodavaca u Federaciji BiH**
- **Udruženje poslodavaca u FBiH pozdravlja usvajanje Zakona o izmjenama i dopunama Zakona o doprinosima**
- **Na sjednici Ekonomsko-socijalnog vijeća za teritoriju FBiH raspravljano o efektima Odluke o iznosu najniže plaće**
- **Održana XI sjednica Upravnog odbora Udruženja poslodavaca Kantona Sarajevo**
- **Zastupnički dom PFBiH usvojio po skraćenom postupku Prijedlog zakona o izmjenama i dopunama zakona o doprinosima**







## Održana XXII redovna izborna skupština Udruženja poslodavaca u Federaciji BiH

**Za predsjednika Skupštine UPFBiH imenovan je Amel Kovačević, direktor BH Telecoma**

U Sarajevu je 22. aprila 2025. godine, uz prisustvo velikog broja predstavnika vlasti, sindikata, domaćih i stranih institucija, akademske zajednice, poslodavaca i medija održana XXII redovna izborna skupština Udruženja poslodavaca u Federaciji Bosne i Hercegovine.

Na sjednici su usvojeni ključni izvještaji za rad Udruženja, uključujući Izvještaj o radu UPFBiH za 2024. godinu, Finansijski izvještaj za 2024. godinu, Izvještaj o radu delegacije UPFBiH u Ekonomsko-socijalnom vijeću FBiH, kao i Plan rada i Finansijski plan Udruženja za 2025. godinu.



U okviru izbornog dijela sjednice, donesene su odluke o razrješenju članova dosadašnjih organa Udruženja, te je izabrano rukovodstvo Skupštine, odnosno predsjednik i dva zamjenika predsjednika, novi članovi Upravnog odbora, delegacije poslodavaca u Ekonomsko-socijalnom vijeću za teritoriju Federacije BiH, kao i lica ovlaštenih za zastupanje i predstavljanje Udruženja.



Za predsjednika Skupštine UPFBiH imenovan je Amel Kovačević, direktor BH Telecoma, dok su za njegove zamjenike izabrani Boris Kamšigovski iz HP Pošte i Igor Baroš, vlasnik Baroš d.o.o.

U novi saziv Upravnog odbora izabrani su:

1. Adem Hanić, TMD GROUP, Gradačac
2. Bariša Šušnjar, BINVEST D.O.O. Posušje
3. Behrija Huseinbegović, MAKAMA D.O.O. Bugojno
4. Berina Bajrović, EUROPE GROUP, Sarajevo
5. Damir Vidačak, ASOCIJACIJA PODUZETNIKA HERCEGOVINE
6. Džemal Hasković, DŽEKOS D.O.O. Sarajevo
7. Edin Emšo, DHL INTERNATIONAL D.O.O. Sarajevo
8. Haris Ćoralić, OPAL COMECE D.O.O. Bihać
9. Igor Marković, NSOFT D.O.O. Mostar
10. Katarina Kafadar, OVNAK D.O.O. Vitez
11. Ladislav Bevanda, HERING D.D. Široki Brijeg
12. Mahmut Galijašević, MANN+HUMMEL, Tešanj
13. Mehta Nikhil, ArcelorMittal, Zenica
14. Mujo Hasić, VARIPLAST D.O.O. Gračanica
15. Nagib Mujkić, TISAKOMERC D.O.O. Žepče
16. Nihad Imširović, KONZUM D.O.O. Sarajevo
17. Salih Lemeš, ALTERNATIVA D.O.O. Sarajevo
18. Samir Mustafić, ASA BANKA D.D. Sarajevo
19. Senad Džambić, BINGO GROUP, Tuzla
20. Tomislav Vrdoljak, LIVNO PUTOVI D.O.O. Livno
21. Zijo Tanjo, Udruženje poslodavaca BPKP





**Adem Hanić**



**Nihad Imširović**



**Bariša Šušnjar**



**Behrija Huseinbegović**



**Damir Vidačak**



**Džemal Hasković**



**Berina Bajrović**



**Edin Emšo**



**Haris Ćoralić**



**Ladislav Bevanda**



**Katarina Kafadar**



**Mahmut Galijašević**



**Mujo Hasić**



**Nagib Mujkić**



**Senad Džambić**



**Samir Mustafić**



**Zijo Tanjo**




**Salih Lemeš**



**Igor Marković**



**Tomislav Vrdoljak**



**Méhta Nikhil**



Prisutnima se prigodnim riječima obratio dosadašnji predsjednik Skupštine Boris Kamšigovski, zahvalivši se članovima na ukazanom povjerenju tokom prethodnog mandata te istakao važnost kontinuiteta i zajedništva u radu Udruženja.

Novi predsjednik Skupštine Amel Kovačević izrazio je zahvalnost na ukazanom povjerenju i naglasio kako će se zalagati za još snažniju ulogu Udruženja u zastupanju interesa poslodavaca ali i radnika i unapređenju poslovnog ambijenta u Federaciji BiH.



"Velika mi je čast što sam izabran za predsjednika Skupštine UPFBiH – organizacije koja već više od 23 godine okuplja blizu 23.000 članica i snažno doprinosi privrednom razvoju. UPFBiH predstavlja više od 26% svih privrednih subjekata u kojima je zaposleno više od 45%

ukupno zaposlenih u Federaciji, te je jedino reprezentativno udruženje poslodavaca. Čestitam novoizabranom Upravnom odboru i zahvaljujem dosadašnjim članovima na vrijednom doprinosu. Vjerujem da ćemo, zajedničkim snagama, raditi na jačanju poslovnog ambijenta, reformama i ekonomskom dijalogu." kazao je Kovačević.

Novi predsjednik Upravnog odbora bit će izabran na prvoj konstituirajućoj sjednici ovog tijela iz sastava novoimenovanog Upravnog odbora, a dosadašnji predsjednik UO Adnan Smailbegović zahvalio se na povjerenju, podršci tokom dva mandata koliko je rukovodio Udruženjem te istakao važnost dodatnog jačanja Udruženja, očuvanja jedinstva u organizaciji poslodavaca i posebno naglasio očekivanja u nastavku provedbe fiskalnih reformi, ali i reformi iz oblasti radno-pravnih odnosa, zdravstvenom osiguranju radnika kao i unapređenje rada granskih organizacija posebno u oblasti trgovine, građevine, turizma, ugostiteljstva, metalne, hemijske, drvne i tekstilne industrije i drugo.

Skupština je zaključena konstruktivnom diskusijom o aktuelnim izazovima u privredi i planiranim aktivnostima Udruženja u narednom periodu.

Udruženje se još jednom zahvaljuje cjelokupnom članstvu kao i poslodavcima koji nisu u članstvu Udruženja, predstavnicima vlasti, nadležnih institucija i organizacija te civilnog društva i medija na izuzetnoj podršci u radu, stalnom jačanju Udruženja i provođenju izbornih procedura i imenovanja novog rukovodstva.





## Održana sjednica Ekonomsko-socijalnog vijeća za teritoriju FBiH



Na sjednici Ekonomsko-socijalnog vijeća za teritoriju FBiH, održanoj 29. aprila 2025. godine, raspravljalo se o analizi efekata Odluke o iznosu najniže plaće za 2025. godinu – za prvi kvartal 2025. godine, zatim nastavak aktivnosti na fiskalnim reformama do kraja 2025. godine te analiza problema u oblasti trgovine.



Na sjednici su predstavljeni podaci Zavoda za zapošljavanje Federacije BiH i Porezne uprave Federacije. Podatke koje je dostavio Zavod za zapošljavanje FBiH možete pogledati [OVDJE](#).

Također su predstavljeni podaci o broju poslovnih subjekata koji su ispunjavali sve uslove i ostvarili pravo na dodjelu finansijske pomoći prema Uredbi o mjerama finansijske pomoći privatnim poslodavcima, obrtima i ostalim samostalnim djelatnostima koja definira povrat dijela doprinosa. Podatke možete pogledati [OVDJE](#).

Potvrđena je ranija opredjeljenost Vlade o nastavku fiskalnih reformi kroz usvajanje Zakona o fiskalizaciji transakcija FBiH i izmjene Zakona o

doprinosima s početkom primjene od 01.01.2026. godine.

Predstavnici delegacije poslodavaca inicirali su i raspravu o Zakonu o zdravstvenom osiguranju, te je zaključeno da će UPFBiH dostaviti prijedlog Zakona o izmjenama i dopunama Zakona o zdravstvenom osiguranju, a u smislu dva pitanja koja su i dalje opterećenje u funkcionisanju privrednih društava i obrta, a odnose se na teret plaćanja bolovanja do 42 dana na teret poslodavaca i naknadu troškova zbog povrede na radu ili oboljenja od profesionalne bolesti.



Na sjednici se također razmatrala i inicijativa Udruženja poslodavaca FBiH o povećanju dnevnica za službena putovanja, odnosno izmjenu Uredbe o visini dnevnica za službena putovanja, te je zaključeno da se pripremi prijedlog koji bi se uputio u dalju proceduru.

Poslodavci su ukazali na veliki problem sivog tržišta, online platformi, neradne nedjelje, rada inspekcija i posebno rada malih trgovaca. U okviru analize problema u oblasti trgovine, premijer Vlade FBiH Nermin Nikšić kratko je najavio izmjene Zakona o unutrašnjoj trgovini po pitanju člana 18. (neradna nedjelja) u pravcu rješenja koja ima većina europskih zemalja, odnosno 16 neradnih nedjelja i određena dodatna rješenja za specifičnosti lokalnih zajednica.



## Na Domu naroda PFBiH usvojene izmjene i dopune Zakona o doprinosima



Nakon Zastupničkog, Dom naroda Parlamenta Federacije Bosne i Hercegovine usvojio je, na sjednici održanoj 22. aprila 2025. godine, Zakon o izmjenama i dopunama zakona o doprinosima, čiji predlagač je Federalna vlada.

Ove izmjene donose smanjenje zbirne stope doprinosa za 13,25 posto, odnosno za pet i po indeksnih poena, odnosno sa 41,5 posto na 36 posto.

Naime, smanjuje se stopa doprinosa za penzijsko i invalidsko osiguranje na teret poslodavca za tri i po indeksna poena, kao i stopa doprinosa za zdravstveno osiguranje na teret poslodavca za dva indeksna poena.

Iz Vlade FBiH, kao predlagača izmjena zakona, kazali su da su izmjene i dopune dio seta fiskalnih mjera koje na osnovu svojih programa rada Vlada planira provesti, a posebno se to odnosi na nove zakone o doprinosima i porezu na dohodak.

## Udruženje poslodavaca u FBiH pozdravlja usvajanje Zakona o izmjenama i dopunama Zakona o doprinosima

Udruženje poslodavaca u Federaciji Bosne i Hercegovine pozdravlja usvajanja Zakona o izmjenama i dopunama Zakona o doprinosima na sjednici Doma naroda Parlamenta FBiH održanoj 22. aprila 2025. godine. Ovo je prvi put od 2009. godine da se pristupa smanjenju doprinosa, a na višegodišnju inicijativu Udruženja poslodavaca u FBiH. Ovo zakonsko rješenje je bitno za poslodavce, ali i za radnike, nakon povećanog trošak na teret poslodavaca nastalog zbog donošenja Odlukom o iznosu najniže plaće za 2025. godinu.

Prema usvojenim izmjenama, zbirna stopa doprinosa smanjuje se sa 41,5% na 36%, što predstavlja smanjenje od 5,5%. Konkretno, stopa doprinosa za penzijsko i invalidsko osiguranje na teret poslodavca smanjuje se za 3,5%, dok se stopa doprinosa za zdravstveno osiguranje na teret poslodavca smanjuje za 2%, što predstavlja prvi korak ka rasterećenju privrede i unapređenju poslovnog ambijenta u Federaciji BiH.

Primjena ovog zakona počet će 1. jula 2025. godine, što će omogućiti poslodavcima da planiraju svoje poslovne aktivnosti u skladu s novim fiskalnim okvirom.



UPFBiH podržava ovo zakonsko rješenje kao važan prvi korak ka smanjenju fiskalnog opterećenja privrede. Očekujemo skori nastavak najavljene fiskalne reforme, što uključuje donošenje Zakona o fiskalizaciji transakcija u FBiH kao i donošenje novog Zakona o izmjenama i dopunama Zakona o doprinosima s punom primjenom od 1. januara 2026. godine. Implementacijom

ovih mjera omogućit će se plaćanje doprinosa po jedinstvenoj stopi od 28,5%, što će doprinijeti konkurentnosti i održivosti poslovanja privrednih društava i obrta u Federaciji BiH.

Udruženje poslodavaca u FBiH ostaje posvećeno saradnji s institucijama izvršne i zakonodavne vlasti, ali i sindikatima i drugim zainteresiranim stranama, s ciljem usklađivanja i donošenja neophodnih reformi koje će doprinijeti stvaranju povoljnijeg poslovnog okruženja i jačanju ekonomskog razvoja Bosne i Hercegovine.



## Primjedbe UPFBiH na Nacrt zakona o fiskalizaciji transakcija u Federaciji BiH



Udruženje poslodavaca u FBiH je u sklopu otvorene javne rasprave pripremlilo i Ministarstvu finansija FBiH dostavilo primjedbe na Nacrt zakona o fiskalizaciji transakcija u Federaciji BiH. Primjedbe su sačinjene na osnovu dostavljenih komentara članica, a nakon održanih desetak sastanaka Radne grupe koja je formirana da napravi konačni tekst, kao i sastanaka rukovodstva Udruženja.

Primjedbe možete pročitati [OVDJE](#).

Podsjećamo da je javna rasprava otvorena do 08.05.2025. godine te da članice još uvijek mogu dostaviti svoje komentare i reagovati prema Federalnom ministarstvu finansija putem linka: <https://www.fmf.gov.ba/Post/Read/javnerasprave>

## Zastupnički dom PFBiH usvojio po skraćenom postupku Prijedlog zakona o izmjenama i dopunama zakona o doprinosima



Zastupnički dom Parlamenta Federacije BiH je na 19. redovnoj sjednici koja je održana 02.04.2025. godine usvojio Prijedlog zakona o izmjenama i dopunama Zakona o doprinosima kojim se zbirna stopa doprinosa smanjuje za 5,50 indeksna poena, tj. sa 41,50% na 36%. To praktično znači da se stopa za

penzijsko i invalidsko osiguranje na teret poslodavca smanjuje za 3,50 indeksna poena i stopa doprinosa za zdravstveno osiguranje na teret poslodavca smanjuje za dva indeksna poena.

Udruženje poslodavaca u FBiH podržava početak provođenja fiskalnih reformi donošenjem ovog zakona na čemu privrednici i obrtnici u čitavoj Federaciji BiH insistiraju već 16 godina, tačnije od 2009. godine. Sa druge strane, usvajanje ovog zakona svakako ne predstavlja očekivano i konačno rasterećenje privrede nego je samo mali korak prema krajnjem cilju. Ovim zakonom realiziraju se prvi koraci obećanih i najavljenih reformi, a prema javno datim obećanjima i najavama naredni koraci će se desiti u drugoj polovini ove godine kroz donošenje i početak primjene Zakona o fiskalizaciji transakcija u Federaciji BiH i konačno smanjenje doprinosa na 28,5% sa početkom primjene od 01.01.2026. godine, kao i unapređenje pitanja parafiskalnih opterećenja, zdravstvenog osiguranja, minimalne plaće, poreza na dobit, i dr.

Također, važna izmjena za poslodavce i radnike jeste i usklađivanje ovog zakona sa presudom Ustavnog suda Federacije Bosne i Hercegovine, broj: U-22/21 od 21.03.2023. godine čime se omogućava poslodavcima da plaćaju doprinose na osnovu stvarnog angažovanja radnika za nepuno radno vrijeme (četiri sata ili manje) što sprječava plaćanje duplih doprinosa u punom iznosu u slučaju kada radnik radi kod dva ili više poslodavaca. Pri tome osnovica za obračun doprinosa ne može biti niža od 50% iznosa najniže plaće utvrđene posebnim propisom. Podsjećamo da bi ovaj zakon stupio na snagu mora ga u istovjetnom tekstu usvojiti i Dom naroda Parlamenta Federacije BiH, a primjenjivat će se od 01. jula 2025. godine.

Udruženje poslodavaca u FBiH će inicirati sastanke u Vladi FBiH s ciljem usaglašavanja prioriteta i dogovora oko sljedećih koraka u fiskalnim reformama.



## Održana XI sjednica Upravnog odbora Udruženja poslodavaca Kantona Sarajevo



Sjednica Upravnog odbora Udruženja poslodavaca Kantona Sarajevo održana je 08. aprila 2025. godine na kojoj je razmatrana i tačka dnevnog reda koja se odnosila na donošenje odluke o izboru kandidata za imenovanje u organe i tijela Udruženja poslodavaca u FBiH za predstojeću XXII redovnu izbornu Skupštinu UPFBiH. Zaključeno je da će članovi obaviti razgovore sa potencijalnim kandidatima, nakon čega će prijedlozi biti dostavljeni UPFBiH.

Članovi Upravnog odbora razmatrali su i izvještaj delegacije poslodavaca o radu Ekonomsko-socijalnog vijeća za područje Kantona Sarajevo, te potvrdili imenovanja predstavnika UP KS za članove Radne grupe za kreiranje upisne politike u srednjim školama.

Također, članovi su informisani o aktuelnim javnim raspravama za zakone na nivou Federacije BiH te je predsjednik UO Suhad Ećo pozvao članove da se aktivno uključe u proces i doprinesu javnim raspravama koje su u toku.

U okviru tačke „Tekuća pitanja" razmatrana su i druga pitanja od značaja za rad Udruženja.



# UDRUŽENJE POSLODAVACA

---

**UDRUŽENJE POSLODAVACA FBiH**  
**MARŠALA TITA 6, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**